

Escrì pèr lou baroun Guillibert

Quand maridè soun fièu

La barounié di Guillibert
Longo-mai crèisse e reflourigue
E Santo Estello ié sourrigue
Emai l'Amour, nunc et semper

Escrì pèr lou libre de Charle Maurras

Les amants de Venise

L'Amour es un diéu vierge,
L'Amour viéu qu'en pantai
E, quand ié disès: t'ai!
Se brulo coume un cierge.

Escrì pèr la neissènço de Francés d'Esparbès

Au palais de Fountano-blau (29 de jun 1910)

Fountano-blau, rejouis-te:
Lou rèi Francés vèn de renaisse.
Dóu la que gisclo dóu teté
En pas e glòri Diéu lou paise!

Escrì sus la porto d'un barbié

A Maiano

Quand te diguèsson Barbo-d'ase,
Intro mignot, vers Mourrinet
E, s'as besoun que te rase,
Auras lèu lou mourre net.

Escrì sus la porto d'un courdounié

En Arle

Quau bèn se causso
De proun s'enausso
Car, fugue di sèns vous facha,
Lou tiro-pèd fai tout marcha.
